

La costion ladina te Fascia

Che restel pa de la revendicazions de chisc egn?

Volesses con l'ocajion portèr dant vèlch conscidrazion entornvia la costion ladina te Fascia anchecondi.

»Unità« o »Uniformità Ladina«?

L'unità ladina cognessa esser sessa-ben l prum obietif di ladins, ma realisticamenter fosc no l é amò l moment de poder en rejonèr sot la forma tradizionèla che fossa chela di confins. Aboncont se podessa piutost rejonèr de uniformità ladina, entenuda desche »sistem operatif« anter i ladins. Peisse che ence se te desvalives contesé provinzièi o regionèi, per desvaliva robes se podessa troèr formule organisatives unitères ence sot l profil amministratif. Chiò l Südtirol a mie veder l pel raprejentèr n model da ge jir do, ajache ence aló no vegn più rejonà de mudèr i confins ma piutost se rejona de cofèr a jir sorafora i confins, ence nazonèi. Chesta podessa esser la

strèda ence per i ladins: troèr soluzions de interazion, colaborazion, conescion anter enc e istituzions per se leèr ite dessema e passèr sorafora i confins.

Conseier Provinzièl Ladin de Fascia

Coluna la pèrt politica del Conseier Ladin anchecondi? Dreta, cencia o raprejentant de val trèss n partit de regoeta (model SVP)? Che sort de forza politica pelel aer un conseier su 35? Coluna la forza contratuala a nivel politich de na val de 10 mile persones tel Trentin olache la politica la ge va do al numer de stimes e segur no al prinzip de la raprejentanza per grop linguistich?

L Comun General de Fascia

Coluna él la pèrt del Comun General de Fascia? L CGF – atualmenter – él più important sul pian politich

che amministratif? Coluna la pèrt politica del Procurador anter Ombolc, Conseier Ladin, Comuns, Provinzia e Region?

Fossel de utol che l CGF dovente l ent de referiment per sottoscriver cordanzes, convenzions, colaborazions con etres enc ladins, per ejempie: Ofize Cultura Ladina (Prov. Busan), Istitut Culturai, Scuola, Università Ladina Persenon, altra istituzions e organismes desche l'APT?

Scuola Ladina de Fascia

L model paritetich de la scola de Gherdena e Badia podessel esser amò atual per noscia val? Ai fins de na scola plurilinguistica, desche ladins, él da ge jir do al sistem CLIL (trentin) o a chel de la scola paritetica (Gherdena e Badia) che l à n endrez jà colaudà, material aldò e magari

con dozenc todesc de marelenga? Podone pissèr a maores leames anter la Scuola Ladina fascèna e i organismes de la scoles de Gherdena e Badia (Intendenza, IPL, Università de Persenon, e c.i.)? Coluna él la valuta e soraldut la prospetives per na scola de na mendranza linguistica te na Provinzia monolingue?

Scomenzadives culturèles e linguistiches

Bilinguism: a che pont sione? Co pa jir inant col »ladin amministratif«? Co éla co la दौरa del ladin te e per la comunanza? Colunes él la prospetives per jir inant col bilinguism te n contest monolingustich desche la Provinzia de Trent? Ai fins de la defendura, de la दौरa e de la promozion del lengaz de mendranza fossel de utol vardèr, chierir l confront e la interazion con n model plurilingustich desche chel e Gherdena e

Badia? Coluna la situazion mass-media? La programazion del Canal 642 éla amò atuèla?

Autonomia Dinamica Ladina

E tinultima, fossel de utol ence per i Ladins dla Dolomites tor su, elaborèr e portèr inant n nef conzet de »Autonomia Dinamica Ladina«? Da me en fora no se cogn pissèr a l'Autonomia desche zeche de cet, de amministratif leà ai confins, ma piutost desche n zeche en evoluzion e che l cogn mudèr aldò di besegnes de la comunanza... chest ence aldò de chel che l à lascià dit l père de l'autonomia Silvius Magnago: »L'autonomia no l é zeche de statich, alincontra la cogn esser veduda desche zeche de dinamiche e che la è bona de se adattèr aldò di mudamenc del jir di tempes«.

Riccardo Zanoner Zigher